

漢魏六朝百三家集

梁

任中丞

第七十六冊



任中丞集

任中丞集題詞

王僧孺之傳任敬子也曰少孺速而未工長卿工而未速孟堅辭不逮理平子意不及文孔璋傷於健仲宣病於弱集論尚書窮文質之敏駢馬停信極疊疊之功莫尚斯焉異哉貶前

修而昂任君其東海之溢美乎江南
文勝古學日微方軌詞苑代有名人
大抵采死翟之毛抉焚象之齒生意
盡矣居今之世爲今之言違時抗往
則聲華不立投俗取妍則爾雅中絕
求其儷體行文無傷逸氣者江文通

任彥升庶幾近之然後知僧孺所稱
非盡謬也彥升在齊朝紆意梅蟲兒
捷入中書旣委誠梁武專典禪讓文
誥諤諤之節豈彼任哉然服官清儉
兒妾食麥卒于新安浣衣斂體有足
多者齊臺初建褚彥回王仲寶首稱

翊運身沒皆無餘財論人當日其大
者死生去就爾廉名非所難也昭明
文選載彥升令表序狀彈文生平筆
長可悉推見輜輶擊鞞坐客恒滿有
以夫

婁東張溥題

任中丞集目錄

賦

答陸倕知已賦

靜思堂秋竹賦

賦體

詔

爲武帝初封功臣詔

求薦士詔

爲武帝追封丞相長沙王詔

爲武帝追封永陽王詔

追封衡陽王桂陽王詔

封臨川安興建安三王詔

爲齊帝禪位梁王詔

璽書

禪梁璽書

冊

禪梁冊

令

爲齊宣德皇后答梁王令

宣德皇后再敦勸梁王令

爲宣德皇后重敦勸梁王令

教

爲齊竟陵王世子臨會稽郡教

表

爲齊明帝讓宣城郡公表

爲范尚書讓吏部封侯表

爲褚諮議綦讓代兄襲封表一

爲褚諮議綦讓代兄襲封表二

爲褚諮議綦讓代兄襲封表

爲王思遠讓侍中表

爲皇太子求一日一入朝表

請祀郊廟備六代樂表

爲范始興求爲太宰立碑表

爲梁公請刊改律令表

爲蕭揚州作薦士表

爲蕭侍中拜襲封表

爲吏部謝表

彈文

奏彈曹景宗

奏彈劉整

奏彈范縝

彈蕭頴達

啓

上蕭太傅固辭奪禮啓

求爲劉瓛立館啓

奉勅示七夕詩啓

爲王金紫謝齊武帝示太子律序啓

爲卞彬謝修卞忠貞墓啓

牋

到大司馬記室牋

梁國府僚勸進牋

府僚重請牋

書

爲庾杲之與劉居士蚪書

荅何胤書

與江革書

與沈約書

弔樂永世書

策文

天監三年策秀才文三首

序

王文憲集序

文章緣起序

議

齊明帝謚議

哀策文

王貴嬪哀策文

碑

丞相長沙宣武王碑

桓宣城碑

墓銘

撫軍桂陽王墓銘

劉先生夫人墓銘

行狀

齊竟陵文宣王行狀

齊司空曲江公行狀

弔文

吊劉文範文

詩

爲王嫡子侍皇太子釋奠宴

贈王僧孺

答劉居士

九日侍宴樂遊苑

奉和登景陽山

泛長溪

落日泛舟東溪

濟浙江

贈郭桐廬出谿口見候余既未至郭仍

進村維舟久之郭生方至

答何徵君

贈徐徵君

答劉孝綽

答到建安餉杖

寄到漑

別蕭諮議

厲吏人講學

苦熱

同謝朓花雪

出郡傳舍哭范僕射三首

嚴陵瀨

詠池邊桃

聯句

清暑殿聯句栢梁體

附錄

本傳

任中丞集目錄終

任中丞集卷全

梁 樂安任 昉彥升著

明 太倉張 溥天如閱

賦

答陸倕知己賦

原知己之時義故相知之信然乃貪廉之異貫
奈勇怯之相懸貪在物而成累怯在我而可甄
既自得於爲御復甘心於執鞭矧相知其如此
獨攬涕而潺湲雖有望於已知更非謂其知己

信偉人之世篤。本侯服於陸鄉。緬風流於道素。
襲袞衣與繡裳。逮伊人而世載。並三駿而龍光。
過龍津而一息。望鳳條而載翔。彼白玉之雖潔。
此幽蘭之信芳。思在物之取譬。非升斛而能量。
匹聳峙於東嶽。比凝厲於秋霜。不一飯以忘過。
每三錢以投渭。匪蒙袂之敢嗟。豈溝壑之能衣。
旣蘊藉其有餘。又澹然而無味。得意同乎卷懷。
違方似乎仗氣。類平叔而靡雕。似子臺而不朴。
冠衆善而貽操。綜群言而名學。折高戴於后臺。

異鄒顏乎董幄。探三詩於河間。訪九師於淮曲。
術兼口傳之書。藝廣鏗鏘之樂。時坐睡而懸梁。
裁據梧而錐幄。旣文過而意深。又理勝而辭縟。
咨余生之荏苒。追歲暮而傷情。測徂陰於堂下。
聽鳴鐘於洛城。惟忘年之陸子。定一遇於班荆。
余獲田蘇之價。爾得海上之名。信落魄而無產。
終長勤於短生。饑虛表於徐步。逃責顯於疾行。
子比我於叔則。又方余於耀卿。心照情交流言。
靡惑萬類。闇求千里。懸渴言象。可廢筌蹄。自默。

居非連棟行則同車冬夜不長夏日靡餘肴核
非餌絲竹豈娛我未捨駕子已迴輿中飲相顧
悵然動色邦壤雖殊離會難測存異山陽之居
沒非要離之側以膠投漆中離婁豈能識

靜思堂秋竹賦

靜思堂連洞房臨曲沼夾脩篁竹宮豐麗于甘
泉之右竹殿弘敞于神嘉之傍綠條發丹檻翠
葉映雕梁入房掃文石傍簷拂象牀常生偶蘭
桂結實值鴛凰逢性與之至道偶斯文之在茲

歡柏梁之有賦，恨相如之異時。

賦體

俶征侶兮艤行舟，奉君命兮不俟駕。屬軒軌之
易循，值堯民之可化。慙孺雉之聲朝，惡細魚之
在夜。奉玉檢之陸離，待金壘之云舍。

何曰元傳

卷全

三

詔

爲武帝初封功臣詔

草昧權輿。事深締構。康俗成務。義在庇民。自非
群才並軌。文武宣翼。將何以啓茲景祚。弘此帝
圖。或運籌帷帳。經啓王業。或攻城略埜。殉義忘
生。或腹心爪牙。折衝禦侮。忠勤茂德。夷險一致。
並宜建國開宗。蕃屏王室。山河之誓。永永無窮。
求薦士詔

夫進賢茂賞。蔽善明罰。前王盛則。咸必由之。朕

纂統鴻業，寅畏大寶，思求俊異，協贊雍熙，歷聽九功，物色輿皂，而白駒盈谷，萋楚未刈，是以臨朝永歎，口曷伊仁，便可博詢卿士，各舉所知，將量才授能，擢以不次，庶同則哲之明，稱朕急賢之旨。

爲武帝追封丞相長沙王詔

夫褒崇名器，率由舊章，光昭德祀，永世作則，亡兄道被如仁，功深微管，懸諸日月，久而彌新，故能拯龜玉於已毀，導涸源於將塞，今理運維新

賢戚並建、感惟永遠、觸目崩心、可追封長沙郡王、

爲武帝追封永陽王詔

亡兄德履冲粹、識業深通、徽聲善譽、風流籍甚、道長世短、清塵緬邈、感惟既往、永慕慟心、可追封永陽郡王、

追封汝陽王桂陽王詔

亡弟暢、風標秀物、器體淹弘、朱方之役、盡勤王事、策出無方、物惟不賞、亡弟融、業行清簡、風度

閒綽蚤優名輩。夙廣令聞。朕應天紹命。君臨萬
寓。祚啓郇滕。感興魯衛。事往運來。永懷傷切。暢
可追封衡陽郡王。融可桂陽郡王。

封臨川安興建安三王詔

神州帝城。冠冕列岳。渚宮樊鄧。形勝是歸。居中
作衛。翼翼宣戎。重隆茲寵。號寔允舊。章並非親。勿
居。惟賢斯授。宏朕之介弟。早富德譽。董一蕃政。
緝是嘉庸。國禮家情。瞻寄隆重。季風頴儁。邁誠
業標簡。任居蕃翰。政以化成。偉體韻淹。穆神寓

凝正經綸夷險參贊王業

爲齊帝禪位梁王詔

夫五德更始三正迭興馭物資賢登庸啓聖故
帝跡所以代昌王度所以改耀革晦以明由來
尚矣齊德淪微危亡荐襲隆昌凶虐寔違天地
永元昏暴取紊人神三光再沈七廟如綴鼎業
幾移含識知泯我高明之祚眇焉將墜永惟屯
難氷谷載懷相國梁王天誕睿哲神縱靈武德
格立祗功均造物止宗社之橫流反生民之塗

炭扶傾頽構之下、拯溺逝川之中、九區重緝、四
維更紐、絕禮還紀、崩樂復張、文館盈紳、戎亭息
警、浹海寓以馳風、罄輪裳而稟朔、八表呈祥、五
靈效祉、豈止鱗羽禎奇、雲星瑞色而已哉、勲茂
於百王、道昭乎萬代、固以明配上天、光華日月
者也、河嶽表革命之符、圖讖紀代終之運、樂推
之心、幽顯共積、謳頌之誠、華裔同著、昔水政旣
微、木德升緒、天之厯數、實有所歸、握鏡璇樞、允
集明哲、朕雖庸蔽、聞於大道、永鑒崇替、爲日已

久敢忘列代之高義人祇之至願乎今便敬禪
于梁卽安姑熟依唐虞晉宋故事

璽書

禪梁璽書

夫生者天地之大德。人者含生之通稱。並首同本。未知所以異也。而稟靈造化。賢愚之情不一。託性五常。強柔之分或舛。群后靡一。爭犯交興。是故建君立長。用相司牧。非謂尊驕在上。以下爲私者也。兼以三正迭改。五運相遷。綠文赤字。徵河表洛。在昔勛華。深達茲義。眷求明哲。授以蒸人。遷虞事夏。本因心於百姓。殷化爲周。實

受命於蒼昊。爰自漢魏。罔不率由。降及晉宋。亦
遵斯典。我高皇所以格文祖而撫歸運。畏上天
而恭寶曆者也。至於季世。禍亂荐臻。王度紛糾。
姦回熾積。億兆夷人。刀俎爲命。已然之逼。若綫
之危。跼天踏地。逃形無所。群凶挾煽。志逞殘戮。
將欲先殄衣冠。次移龜鼎。衡保周召。並列宵人。
巢幕累卵。方此非切。自非英聖遠圖。仁爲己任。
則鷗臬厲吻。翦焉已及。惟王崇高。則天博厚。儀
地鎔鑄。六合陶甄。萬有鋒驛交馳。振靈武以遐

略雲雷方扇，鞠義旅以勤王。揚旂於遠路，戮
姦宄於魏闕。德冠往初，功無與二。弘濟艱難，緝
熙王道。懷柔萬姓，經營四方。舉直措枉，較如畫
一。待旦同乎殷后，日昃過於周文。風化肅穆，禮
樂交暢。加以赦過宥罪，神武不殺。盛德昭於景
緯，至義感於鬼神。若夫納彼大麓，膺此歸運。烈
風不迷，樂推攸在。治五躔於巳亂，重九鼎於旣
輕。自聲教所及，車書所至。革面回首，謳吟德澤。
九山滅禋，四瀆安流。祥風扇起，淫雨靜息。玄甲

遊於芳荃、素文馴於郊苑、躍九川於清漢、鳴六
象於高崗、靈瑞雜沓、立符昭著、至於星孛紫宮、
水効孟月、飛鴻滿埜、長彗橫天、取星之應、旣昭。
革故之徵、必顯、加以天表秀特、軒狀堯姿、君臨
之符、諒非一揆、書云、天監厥德、用集大命、詩云、
文王在上、於昭于天、所以二儀乃眷、幽明允叶、
豈惟宅是萬邦、緝茲謳訟而已哉、朕是用擁璇
沈首、屬懷聖哲、昔水行告厭、我太祖旣受命、代
終在日、天祿云謝、亦以木德而傳於梁、遠尋前

典降惟近代、百辟遐邇、莫違朕心、今遣使持節
兼太保侍中中書監兼尚書令汝南縣開國侯侯
亮兼太尉散騎常侍中書令新吳縣開國侯志
奉皇帝璽綬、受終之禮、一依唐虞故事、王其陟
茲元后、君臨萬方、式傳弘烈、以答上天之休命

冊

禪梁冊

咨爾梁王、惟昔邃古之載、肇有生人、皇雄大庭
之辟、赫胥尊盧之后、斯並龍圖鳥跡以前、慌忽
杳冥之世、固無得而詳焉、洎乎農軒炎皞之代、
放勳重華之主、莫不以大道君萬姓、公器御入
紘、居之如執朽索、去之若捐重負、一駕汾陽、便
有窅然之志、鑿適箕嶺、卽動讓王之心、故知戴
黃屋、服玉璽、非所以示貴稱尊、乘大輅、建旆旌

蓋欲令歸趣有地。是故忘已而字兆人。殉物而君四海。及於精華內竭。畚櫬外勞。則撫茲歸運。惟能是與。况兼乎笙管革文威。圖啓瑞。攝提夜朗。熒光晝發者哉。四百告終。有漢所以高揖。黃德旣謝。魏氏所以樂推。爰及晉宋。亦弘斯典。我太祖握河受厯。應符起運。二葉重光。三聖係軌。嗣君喪德。昏棄紀度。毀紊天綱。凋絕地紐。茫茫九域。翦爲仇讐。溥天相顧。命懸晷刻。斲涉剗孕。於事已輕。求雞徵杖。曾何足譬。是以谷滿川枯。

山飛鬼哭、七廟已危、人神無主、惟王體茲上哲、
明聖在躬、稟靈五緯、明並日月、彝倫攸序、則端
冕而協邕熙、時難孔棘、則推鋒而拯塗炭、功踰
造物、德濟蒼生、澤無不漸、仁無不被、上達蒼昊、
下及川泉、文教與鵬翼齊舉、武功與日車並運、
固以幽顯宅心、謳訟斯屬、豈徒桴鼓播地、卿雲
叢天而已哉、至如晝覩爭明、夜飛枉矢、土淪彗
刺、日旣星亡、除舊之徵必顯、更姓之符允集、是
以義師初踐、芳露凝甘、仁風旣被、素文自擾、北

闕、藁、街、之、使、風、車、火、徼、之、民、膜、拜、稽、首、願、爲、臣
妾、鍾、石、畢、變、事、表、於、遷、虞、蛟、魚、並、出、義、彰、於、事
夏、若、夫、長、人、御、衆、爲、之、司、牧、本、同、已、於、萬、物、乃
因、心、於、百、姓、寶、命、無、常、主、帝、王、非、一、族、今、仰、祇
乾、象、俯、藉、人、願、敬、禪、神、器、授、帝、位、於、爾、躬、大、祚
告、窮、天、祿、永、終、於、戲、王、允、執、其、中、式、遵、前、典、以
副、昊、天、之、望、禋、上、帝、而、臨、億、兆、格、文、祖、而、膺、大
業、以、傳、無、疆、之、祚、豈、不、盛、歟、

令

爲齊宣德皇后答梁王令

承固茲謙揖，未膺大典，敬復雅旨，良有懽然。夫
至寂難原，言象所絕，教思有律，感通斯在。所以
異人者神明，同人者用舍。王誕茲上睿，對越天
行，德冠二儀，化周群動，生民以來，一人而已。但
達節弘道，每濡跡於中庸，神照惟幾，不抑心於
鑽仰。范宣旣讓，其下取則，况聖圖睿範，歌思是
歸，廉約雖弘，慶賞遂替，誠賢者悅義，長難進之

風不肖者、矜功阻竭、力之效勸阻之間、所差已遠、王何得不暫紆雅尚、允答天人、使朕夜艾以安、早朝有豫、今遣率茲百辟、申薦誠款、萬致一塗、煩言可略、

宣德太后再敦勸梁王令

宣德皇后敬問具位、夫功在不賞、故庸勲之典、蓋闕、施侔造物、則謝德之途已寡、要不得不強爲之名、使荃宰有寄、公實天生德、齊聖廣淵、不改參辰、而九星仰止、不易日月、而二儀貞觀、在

昔晦明。隱鱗戢翼。博通群籍。而讓齒乎一卷之師。劔氣凌雲。而屈迹於萬夫之下。辯析天口。而似不能言。文擅雕龍。而成輒削橐。爰在弱冠。首應弓旌。客游梁朝。則聲華籍甚。薦名宰府。則延譽自高。隆昌季年。勤王始著。建武維新。締構斯在。功隆賞薄。嘉庸莫疇。一馬之田。介山之志。愈厲。六百之秩。大樹之號。斯存。及擁旄司部。代馬不敢南牧。推轂樊鄧。胡塵罕嘗。夕起。惟彼狡童。窮凶極虐。衣冠泯絕。禮樂崩喪。旣而鞠旅誓衆。

言謀王室、白羽一麾、黃鳥底定、甲旣鱗下、車亦瓦裂、致天之届、拱揖群后、豐功厚利、無得而稱、是以祥光總至、休氣四塞、五老游河、飛星入昴、元功茂勲、若斯之盛、而地狹乎四履、勢卑乎九伯、帝有愆焉、輶軒萃止、今遣某位某甲等率茲百辟、人致其誠、庶匪席之旨、不遠而復、

爲宣德太后重啟勸梁王令

朕聞匹夫好仁、義在摩踵、君子行道、達斯兼濟、未有盡器窮神、蘊徽章乎天植、高奠中樽、覩傾

壘而弗拯，惟王德冠往初，功無與二，四時等絜，
兩曜齊明，擬度天行，取則乾健，而運距艱季，道
極百王，援義而起，一戎大定，羅山革草，罔不率
從，用使商庭，產蒸周闕，樹梓傾宮，旣散鹿臺，靡
蓄盛德大業，巍巍若此，日者事岐之號，爰發帝
言，殊物備禮，率由寡昧，雖復雲竿載路，清蹕啓
行，昭德報功，未臻其極，而高揖天休，遠存克讓，
俾予未忘，興慙日昃，今遣率茲百辟，人致誠情，
庶有感睿心，霈然降志。

何口五集

集

三

教

爲齊竟陵王世子臨會稽郡教

富人兼并前史共蠹大姓侵威往哲攸嫉而權
豪之族擅割林池勢富之家專利山海至乃水
稱峻巖嚴我君后崇墉增仞內通神明出符大
順火炎崑崙神嶽崩潰蘭艾同燼玉石俱碎哲
人遭命哀有餘慨

任中丞集

卷全

共

表

爲齊明帝讓宣城郡公表

明帝作相令昉草讓封表沿故事也、昉濡瀉懇迫情事太露故帝愠之、

臣鸞言、被臺召以臣爲侍中、中書監、驃騎大將軍、開府儀同三司、揚州長史、錄尚書事、封宣城郡開國公、食邑三千戶、加兵五千人、臣本庸木、智力淺短、太祖高皇帝篤猶子之愛、降家人之慈、世祖武皇帝情等布衣、寄深同氣、武皇大漸、實奉話言、雖自見之、明庸近所蔽、愚夫一至、偶

識量已實。不忍自固於綴衣之辰。拒違於玉几之側。遂荷顧託。導揚末命。雖嗣君棄常。獲罪宣德。王室不造。職臣之由。何者。親則東牟。任惟博陸。徒懷子孟。社稷之對。何救昌邑。爭臣之譏。四海之議。於何逃責。陵土未乾。訓誓在耳。家國之事。一至於斯。非臣之尤。誰任其咎。將何以肅拜高寢。虔奉武園。悼心失圖。泣血待旦。宥容復徼榮於家。耻宴安於國。危驃騎上將之元勳。神州儀刑之列岳。尚書古稱司會。中書實管王言。且

虛飾寵章。委成禦侮。臣知不愜。物誰謂宜。但命輕鴻毛。責重山嶽。存沒同歸。毀譽一貫。辭一官不減身累。增一職已黷朝經。便當自同體國。不爲飾讓。至於功均一匡。賞同千室。光宅近甸。奄有全邦。殞越爲期。不敢聞命。亦願曲留降鑒。卽垂聽許。鉅平之懇誠必固。永昌之丹慊獲申。乃知君臣之道。綽有餘裕。苟曰易昭。敢守難奪。故可庶心弘議。酌已親物者矣。不勝荷懼屏營之誠。謹附某官某甲奉表以聞。

爲范尚書讓吏部封侯表

臣雲言、被尚書召以臣爲散騎常侍吏部尚書
封霄城縣開國侯食邑千戶奉命震驚心顏無
措臣雲頓首頓首死罪死罪臣素門凡流輪翮
無取進謝中庸退慙狂狷固嘗鑽厲求學而一
經不治篆刻爲文而三冬靡就負書燕魏空殫
菽粟躡屩齊楚徒知貧賤旣而分虎出守以囊
被見唾持斧作牧以蕙苾興謗赭衣爲虜見獄
吏之尊除名爲民知井臼之逸百年上壽旣曰

徒然。如其誠說。亦以過半。亂離斯瘼。欲以安歸。
閉門荒郊。再離寒暑。兼以東臯數畝。控帶潮汐。
關外一區。悵望鍾阜。雖室無趙女。而門多好事。
祿微賜金。而歡同娛。老折芟燔。枯此焉自足。陛
下應期萬世。接統千祀。三千景附。八百不謀。臣
釁等離心。功慙同德。泥首在顏。輿棺未毀。締構
草昧。敢叨天功。獄訟謳歌。示同民志。而隆器大
名。一朝總集。顧已反躬。何以臻此。政當以接開
白水。列宅舊豐。忘捨講之尤。存諸公之費。俯拾

青紫。豈待明經。臣雲頓首頓首。死罪死罪。臯夫銓
衡之重。關諸隆替。遠惟則哲。在帝猶難。漢魏以
降。達識繼軌。雅俗所歸。唯稱許郭。拔十得五。尚
曰比肩。其餘得失。未聞偶察。童幼天機。暫發顧
無足算。在魏則毛玠。公方居晉。則山濤。識量以
臣况之一。何遼落。齊季陵遲。官方淆亂。鴻都不
綱。西園成市。金章有盈。筍之談。華貂深不足之
嘆。草創惟始。義存改作。恭已南面。責成斯在。豈
宜妄加寵私。以乏王事。附蟬之飾。空成寵章。求

之公私授受交失。近世侯者。功緒參差。或足食關中。或成軍河內。或制勝帷幄。或門人加親。或與時抑揚。或隱若敵國。或策定禁中。或功成埜戰。或盛德如卓茂。或師道如桓榮。或四姓侍祀。已無足紀。五侯外戚。且非舊章。而臣之所附。唯在恩澤。旣義異疇庸。實榮乖儒者。雖小人貪幸。豈獨無心。臣本自諸生家。承素業。門無富貴。易農而仕。乃祖立平。道風秀世。爰在中興。儀刑多士。位裁元凱。任止牧伯。高祖少連。夙秉高尚。所

富者義。所乏者時。薄宦東朝。謝病下邑。先志不忘。愚臣是庶。且去歲冬初。國學之老博士耳。今茲首夏。將亞冢司。雖千秋之一月九遷。苟爽之十旬遠至。方之微臣。未爲速達。臣雖無識。唯利是視。至於虧名損實。爲國爲身。知其不可。不敢妄冒。陛下不棄管蒯。愛同絲麻。儻平生之言。猶在聽覽。宿心素志。無復貳辭。矜臣所乞。特廻寵命。則彝章載穆。微物知免。臣今在假。不容請省。不任荷懼之至。謹奉表以聞。

爲褚諮議纂讓代兄襲封表一

一昨被司徒符印稱詔旨許臣兄賁所請以臣
紹封南康郡公臣世屬啓聖運偶時來尚德疇
庸先錫土宇臣賁載世承家兄居長德而量已
夙退內事園蔬以臣行達幽明早酷荼苦賁天
倫冥至友愛涓深非直引瘖推溫故能逃迹讓
位鞠育提養以及人次事死讓生尚均脫屣取
信十室本若錙銖乃遠謬推恩近霑庸薄能以
國讓弘義有歸匹夫難奪守以弗二昔武始迫

家臣之策。陵陽感鮑子之言。張以誠請。丁爲理
屈。且大宗絕緒。命臣出纘。傍統稟承。在昔理絕。
終天永懷。情事觸感。崩裂伏惟。陛下俯權孤門。
哀榮之重。爰奪臣賁。一至之輕。察其丹款。特賜
停絕。至公允穆。微臣克幸。

爲褚諮議綦讓代兄襲封表二

近冒披款。庶蒙哀亮。奉被還詔。未垂矜允。伏讀
周遑罔寘。心誠臣本。凡劣身名。不限標一。善不
足以驗風流。存小讓不足以弘進止。若乃富埒

千駟貴有邦家，二者之來，不期而止。中人猶其
趨趨，凡近固宜勉勗，直以門緒有歸，長德無二。
若使賁高延陵之風，臣志子臧之節，是廢德舉，
豈曰能賢。陛下留心孤門，特深追遠，故臣窮必
呼天，憑威咫尺，賁嬰疾沉固，公私廢禮，逢不世
之恩，遂良已之志，確然難奪，有理存焉。臣既承
先旨，出纘，俯統受命，有資反身，何奉敘心感悼，
義迫窮誠，賁息霽年，將志學禮，及趨拜且私門，
世適二三，攸序若天，眷無已，必降殊私，乞臣霽

奉膺珪社、伏願陛下聖慈、曲垂矜慎、如蒙哀允、
施重含育

爲褚諮議綦讓代兄襲封表

臣綦言、昨被司徒符仰稱詔旨、許臣兄賁所請、
以臣襲封南康郡公、臣門籍勲蔭、光錫土宇、臣
賁世載承家、允膺長德、而深鑒止足、脫屣千乘、
遂乃遠謬推恩、近萃庸薄、能以國讓、弘義有歸、
匹夫難奪、守以勿貳、皆武始迫家臣之策、陵陽
感鮑生之言、張以誠請、丁爲理屈、且先臣以大

宗絕緒命臣出纂傍統稟承在昔理絕終天永
惟情事觸目崩隕若使賁高延陵之風臣忘子
臧之節是廢德舉豈曰能賢陛下察其丹款特
賜停絕不然投身草澤苟遂愚誠耳不任丹慊
之至謹詣闕拜表以聞臣誠惶誠恐

此篇出文選與藝文

所載二表中有異同恐是後人哀合爲一今並載之

爲王思遠讓侍中表

行則六尺之內陪接天光語則親璽申命誠信
區宇獻可替否出納惟幾敷奏於聲華之上進

讓於玉堂之下。金遷七貴之茂。王粲二公之孫。雖復仲尉孤緒。元卿未裔。未有不階民譽。妄承私者也。

爲皇太子求一日一入朝表

臣聞內豎告安。姬昌怡色。鳴雞戒旦。周發冠履。或以涼燠之候。晨昏異宜。膳羞之和。鼎飪殊節。一辰三朝。稱情猶簡。終日承顏。在理斯愜。且長壽之對。撫循無已。馳道未窮。顧懷不輟。豈直下動天性。固亦上結慈衷。自頃半旬。乃朝遂爲通。

制事諭信次義乖晨省一日萬機不敢三塵御省。每日改宿。特乞一至寢門。

請祀郊廟備六代樂表

據魏王肅議周禮賓客皆作備樂况天地宗廟事之大者周官以下六律六呂五聲八音六舞大合樂致鬼神以和邦國請依王肅祀祭郊廟備六代樂

爲范始興求爲太宰立碑表

臣雲言原夫存樹風猷沒著徽烈旣絕故老之

口。必資不刊之書。而藏諸名山。則陵谷遷貿。府
之延閣。則青編落簡。然則配天之迹。存乎泗水
之上。素王之道。紀於沂川之側。由是崇師之義。
擬迹於西河。尊主之情。致之於堯禹。故精廬妄
啓。必窮鐫勒之盛。君長一城。亦盡刊刻之美。况
乎甄陶周召。孕育伊顏。故太宰竟陵。文宣王臣
某。與存與亡。則義形社稷。嚴天配帝。則周公其
人。體國端朝。出藩入守。進思必告之道。退無苟
利之專。五教以倫。百揆時序。若夫一言一行。盛

德之風琴書藝業述作之茂道非兼濟事止樂
善亦無得而稱焉人之云亡忽移歲序鴟鴞東
徙松檟成行六府臣僚三藩士女入蓄油素家
懷鉛筆瞻彼景山徒然望慕昔晉氏初禁立碑
魏舒之亡亦從班列而阮略旣泯故首冒嚴科
爲之者竟免刑戮置之者友蒙嘉歎至於道被
如仁功參微管本宜在常均之外故太宰淵丞
相疑親賢並軌卽爲成規乞依二公前例賜許
刊立寧容使長想九原樵蘇罔識其禁駐蹕長

陵。輜軒不知所適。臣里閭孤賤。才無可甄。值齊
網之弘。弛賓客之禁。策名委質。忽焉二紀。慮先
犬馬。厚恩不答。而弊帷毀蓋。未蓐螻蟻珠襦玉
匣。遽飾幽泉。陛下弘獎名教。不隔微物。使臣得
駿奔南浦。長號北陵。既曲逢前施。實仰覲後澤。
儻驗杜預山頂之言。庶存馬駿必拜之感。臨表
悲懇。言不自宣。

爲梁公請刊改律令表

臣聞滄源旣遠。天討是因。畫衣象服。以致刑厝。

草纓艾鞞民不能犯及涓德下衰運距澆季湯
刑禹政不足禁姦九法三章無以息訟所以赭
衣塞路圜犴成市凝脂已疎秋荼未苦姦吏爲
市生殺並用可爲慟哭豈徒一緒夫肖貌天地
稟靈川岳受體愛敬髮膚爲重流矢影風顧有
憂色而當妄加剗斲金衣爲伍且夫刻木不對
畫地不入畏避若是而動貽非命王道爲虧良
在於此法開二門爲政之蠹生殺多緒誰其適
從

爲蕭揚州作薦士表

臣王言、臣聞求賢暫勞、垂拱永逸、方之疏壤、取類導川、伏惟陛下道隱旒纒、信克符璽、六飛同塵、五讓高世、白駒空谷、振鷺在庭、猶思隱鱗卜祝、藏器屠保、物色關下、委裘河上、非取製於一狐、諒求味於乘采、而五聲倦響、九工是詢、寢議廟堂、借聽輿皂、臣位任隆重、義兼家邦、實欲使名實不違、徼倖路絕、勢門上品、猶當格以清譚、英俊下僚、不可限以位貌、竊見秘書丞琅琊王

暎年二十一字思晦七葉重光海內冠冕神清
氣茂允迪中和叔寶理遣之譚彥輔名教之樂
故以暎映先達領袖後進居無塵雜家有賜書
辭賦清新屬言立遠室邇人曠物疎道親養素
邱園台階虛位庠序公朝萬夫傾望豈徒荀令
可想李公不亡而已哉前晉安郡侯官令東海
王僧孺年三十五理尚棲約思致恬敏既筆耕
爲養亦傭書成學至乃集螢映雪編蒲緝柳先
言往行人物雅俗甘泉遺儀南宮故事畫地成

圖抵掌可述。豈直鼯鼠有必對之辯。竹書無落簡之謬。踈坐鎮雅俗。弘益已多。僧孺訪對不休。質疑斯在。並東序之秘寶。瑚璉之茂器。誠言以人廢。而才實世資。臨表悚戰。猶思未允。不任下情。

爲蕭侍中拜襲封表

詔書拜臣襲封竟陵郡王。臣以凡庸。素乏才植。皇朝尚德。詔爵惟賢。遂復出脩職貢。八頒卿士。但有道之守。海外重扃。藩籬近甸。無勞擊柝。仰

閱舊章，俯增私感。報國承家，豈云萬一。

爲吏部謝表

郎官之重，千金非譬。爰在前世，實光選造。清通
爲首，終遂弗居。深識爲度，累薦無獲。承乏攝官，
顧知其望。方今皇明御宇，昇長咸亨，涇渭縉紳，
無謬衡石。抑揚庶品，亦候能官。顧已循涯，孰用
祗荷。惟知死所，未識所報。

任中丞集

卷全

三

彈文

奏彈曹景宗

御史中丞臣任昉稽首言。臣聞將軍死綏。咫尺步
無却。顧望避敵。逗撓有刑。至乃趙母深識。乞不
爲坐。魏主著令。抵罪已輕。是知敗軍之將。身死
家戮。爰自古昔。明罰斯在。臣昉頓首頓首。死罪
死辜。竊尋獯獫。侵軼蹙擾。疆陲王師。薄伐所向。
風靡。是以淮徐獻捷。河兗凱歸。東關無一戰之
勞。塗中罕千金之費。而司部懸隔。斜臨寇境。故

使狡虜憑陵。淹移歲月。故司州刺史蔡道恭率
勵義勇。奮不顧命。全城守死。自冬徂秋。猶轉戰
無窮。亟摧醜虜。方之居延。則陵降而恭守。比之
疎勒。則耿存而蔡亡。若使郢部救兵。微接聲援。
則單于之首。久懸北闕。豈直受降可築。涉安啓
土而已哉。實由郢州刺史臣景宗受命致討。不
時言邁。故使蝟結蟻聚。水草有依。方復按甲盤
桓。緩救資敵。遂令孤城窮守。力屈凶威。雖然。猶
應固守三關。更謀進取。而退師延頸。自貽虧劔。

疆場侵駭。職是之由。不有嚴刑。誅賞安寘。景宗
卽主臣。謹案使持節都督郢司二州諸軍事左
將軍郢州刺史湘西縣開國侯臣景宗。擢自行
間。邁茲多幸。指縱非擬。獲獸何勤。賞茂通侯。榮
高列將。負檐裁弛。鐘鼎遽列。和戎莫效。二八已
陳。自頂至踵。功歸造化。潤草塗原。豈獲自己。且
道恭云逝。城守累旬。景宗之存。一朝棄甲。生曹
死蔡。優劣若是。惟此人斯。有醜面目。昔漢光命
將。坐知千里。魏武置法。案以從事。故能出必以

律、錙銖無爽、伏惟聖武英挺、略不世出、料敵制、
變、萬里無差、奉而行之、實弘廟算、惟此庸固、理、
絕、言提、自逆胡縱逸、久患諸夏、聖朝乃顧、將一、
車書、愆彼司氓、致辱非所、早朝永歎、載懷矜惻、
致茲虧喪、何所逃罪、宜正刑書、肅明典憲、臣謹、
以劾、請以見事、免景宗所居官、下太常削爵土、
收付廷尉、法獄治罪、其軍佐職僚、偏裨將帥、絀、
諸應及咎者、別攝治書、侍御史隨違、續奏、臣謹、
奉白簡、以聞、臣昉誠惶誠恐、頓首頓首、死罪死

臯臣昉稽首以聞

奏彈劉整

御史中丞臣任昉稽首言。臣聞馬援奉嫂。不冠不入。汜毓字孤。家無常子。義士節夫。聞之有立。千載美談。斯爲稱首。臣昉頓首頓首。死罪死罪。臯謹案齊故西陽內史劉寅妻范。詣臺訴列。稱出適劉氏二十許年。劉氏喪亡。撫養孤弱。叔郎整恒欲傷害。侵奪分前奴。教子當百。並已人衆。又以錢婢姊妹弟温。仍留奴。自使又奪寅息。遂婢

綠草私貨得錢、並不分逡、寅第二度息師利去、
歲十月、往整田上、經十二日、整便責范米六斗、
哺食、米未展送、忽至戶前、隔箔攘拳大罵、突進、
房中屏風上、取車帷准米去、二月九日夜、婢采、
音偷車欄夾杖龍牽、范問失物之意、整便打息、
逡、整及母并奴婢等六人來、共至范屋中、高聲、
大罵、婢采音舉手查范臂、求攝檢如訴狀、輒攝、
整父舊使奴海蛤到臺辯問、列稱整亡父興道、
先爲零陵郡、得奴婢四人、分財以奴教子、乞大

息寅寅亡後第二弟整仍奪教子云應人衆整便留自使婢姊及弟各准錢五千文不分送其奴當百先是衆奴整兄弟未分財之前整兄寅以當百貼錢七千共衆作田寅罷西陽郡還雖未別火食寅以私錢七千贖當百仍使上廣州去後寅喪亡整兄弟後分奴婢惟餘婢綠草入衆整復云寅未分財贖當百又應屬衆整意貪得當百推綠草與送整規當百行還擬欲自取當百遂經七年不返整疑已死亡不廻更奪取

婢綠草貨得錢七千、整兄弟及姊共分此錢、又不分、遂寅妻范云、當百是亡夫私贖、應屬息、遂當百天監二年六月從廣州還至、整復奪取、云應克衆准雇、借上廣州四年夫直、今在整處使、進責整婢采音、劉整兄寅第二息、師利去年十月十二日、忽往整墅停住、十二日、整就兄妻范求米六斗哺食、范未得還、整怒、仍自進范所住屏風上取車帷爲質、范送米六斗、整則納受、范今年二月九日夜、云失車欄子夾杖龍牽等、范

及息遂道是采音所偷，整聞聲仍打遂。范喚問何意打我兒，整母子爾時便同出中庭，隔箔與范相罵。婢采音及奴教子楚玉、法忠等四人於時在整母子左右，整語采音其道汝偷車杖具，汝何不進裏罵之。旣進爭口，舉手誤查范臂，車欄夾杖龍牽實非采音所偷，進責寅妻范奴苟奴列娘去。二月九日夜失車欄夾杖龍牽，疑是整婢采音所偷，苟奴與郎遂往津陽門糴米，遇見采音在津陽門賣車欄龍牽，苟奴登時欲捉

取，遂語苟奴，已爾不須復取。苟奴隱避，少時伺視人買龍牽，售五千錢。苟奴仍隨遂歸宅，不見度錢，並如采音。苟奴等列狀，粗與范訴相應。重覈當百教子列稱被奪，今在整處使，悉與海蛤列不異，以事訴法。令史潘僧尚議，整若輒略兒子，遂分前婢貨賣，及奴教子等私使，若無官令，輒收付近獄，測治諸所連逮，絀應洗之，原委之獄官，悉以法制從事，如法所稱。整卽主臣，謹案新除中軍參軍臣劉整，閭閻闖茸，名教所絕，直

以前代外戚仕因純袴惡積釁稔親舊側目理
絕通問而妄肆醜辭終夕不寐而謬加大杖薛
包分財取其老弱高鳳自穢爭訟寡嫂未見孟
嘗之深心唯倣文通之僞迹昔人睦親衣無常
主整之撫姪食有故人何其不能折契鍾瘦而
襜帷交質人之無情一何至此實教義所不容
紳冕所共棄臣等參議請以見事免整新除官
輒勒外付廷尉法獄治罪諸所連逮應洗之源
委之獄官悉以法制從事婢采音不款偷車欄

龍牽請付獄測實宗長及地界職司初無糾舉
及諸連逮請不足申盡臣昉誠惶誠恐頓首頓
首死罪死臯稽首以聞

奏彈范縝

臣聞息夫厯詆漢有正刑白褒一奏晉以明罰
况乎附下訕上毀譽自口者哉風聞尚書左丞
臣范縝自晉安還語人云我不詣餘人惟詣王
亮不餉餘人惟餉王亮輒收縝白從左右萬休
到臺辯問與風聞符同又今月十日御餞梁州

刺史臣珍國宴私既洽群臣並已謁退時詔留侍中臣昂等十人訪以政道。續不答所問而橫議沸騰。遂貶裁司徒臣肫。褒舉庶人王亮。臣于時預奉恩留。肩隨並立。耳目所接。差非風聞。竊尋王有遊豫。親御軒陛。義深推轂。情均湛露。酒闌宴罷。當宸正立。記事在前。記言在後。軫早朝之念。深求瘼之情。而續言不遜。妄陳褒貶。傷濟濟之風。缺側席之望。不有嚴裁。憲准將頽。續卽主臣。謹案尚書左丞臣范續衣冠緒餘。言行舛

駁誇諧里落。喧詬周行。曲學諛聞。未知去代。弄口鳴舌。祇足飾非。乃者義師近次。縝丁罹艱棘。曾不呼門。墨讓景附。頗同先覺。實奉龍顏。而今黨協釁餘。翻爲矛楯。人而無恒。成茲姦誑。日者飲至策勲。功微賞厚。出守名邦。入司管轄。苞蔭罔遺。而假稱折轅。衣裙所弊。讒激失所。許與疵廢。廷辱民宗。自居樞憲。糾奏寂寞。顧望縱容。無至公之議。惡直醜正。有私許之談。宜寘之徽纆。肅正國典。臣等參議。請以見事。免縝所居官。輒

勒外收付廷尉法獄治臯應諸連逮委之獄官
以法制從事續位應黃紙臣輒奉白簡以聞

奏彈蕭穎達

臣聞貧觀所取窮視不爲在於布衣窮居介然
之行尚可以激貪厲俗悼此薄夫况乎伐冰之
家爭雞豚之利衣繡之士受賈人之服風聞征
虜將軍臣蕭穎達啓乞魚軍稅輒攝穎達宅督
彭難當到臺辯問列稱尋生魚典稅先本是鄧
僧琰啓乞限訖今年五月十四日主人穎達於

時謂非新立、仍啓乞接代僧琰、卽蒙降許登稅、與史法論一年、收直五十萬、知其列狀、則與風聞符同、頴達卽主臣、謹按征虜將軍太子左衛率作唐縣開國侯臣頴達備位大臣、預聞執憲、私謁亟陳、至公寂寞、屠中之志、異乎鮑肆之求、魚餐之資、不俟潛有之數、遂復申茲文二、追彼十一、風體若茲、準繩斯在、陛下弘惜勲良、每爲曲法、臣當官執憲、敢不直繩、臣等叅議、請以見事、免頴達所居官、以侯還第。

啓

上蕭太傅固辭奪禮啓

昉啓近啓歸訴庶諒窮款奉被還旨未垂哀察
悼心失圖泣血待旦昉於品庶示均鎔造干祿
祈榮更爲自拔虧教廢禮豈關視聽所不忍言
具陳茲啓往來未宦祿不代耕饑寒無甘旨之
資限役廢晨昏之半膝下之歡已同過隙几筵
之慕幾何可憑且奠醑不親如在安寄晨暮寂
寥間若無主所守旣無別禮窮咽豈及多喻明

公功格區宇。感通有塗。若霈然降臨。賜寢嚴命。是知孝治所被。爰至無心。錫類所及。匪徒教義。不任崩迫之情。謹以啓事陳聞。謹啓。

求爲劉獻立館啓

昔在魏中。爰及晉始。書貴虛立。人悅陶縱。瑚璉廢泗上之容。樽俎恣林下之適。春千秋羽。委曠而弗陳。西序東膠。寂寥而誰仰。所以金雞忘曉。玉羊失馭。神器毀於獯戎。寶厯遷於干越。豈不悲歎。劉獻澡身浴德。脩行明經。賤珪璧於光陰。

竟松筠於歲晚、貧不隕穫其心、窮不二三其操、
而因無居止、浮寓親游、垣棟傾替、室衢墊側、有
朋自遠、無用栖憑、皆負笈擔簦、櫛風沐露、嚙之
器學無謝、前修輒欲與之周旋、開館招屈、臣策
西偏、官有闕地、北拒晉山、南望通邑、雖曰人境、
實少浮喧、廣輪裁盈數畝、布以施立、黌塾薄藝
桑麻、粗創茨宇

奉勅示七夕詩啓

臣昉啓奉勅并賜示七夕五韻竊惟帝迹多緒、

俯同不一託情風什希世罕工雖漢在四世魏
稱三祖。寔足以繼想南風。克諧調露性與天道。
事絕稱言。豈其多幸。親逢旦暮。臣早奉龍潛與
賈馬而入室。晚屬天飛。比嚴徐而待詔。惟君知
臣。見於訥言之旨。取求不疵。表於辯才之戲。謹
輒牽率庸陋。式訓天獎。拙速雖效。蚩鄙已彰。臨
啓慚慙。罔識所寘。謹啓

為王金紫謝齊武帝示太子律序啓

臣聞化澄上業。草纓垂典。教清中世。芟服懲刑。

自禮失宗周。俗友炎漢。張馮導其迹。賈杜浚其流。仲舒之得情。孔子之博約。故以義該往哲。盡美前王。而年世浸遠。篇牘訛誤。朽編落簡。見誣前淑。侮文擅議。取弊後昆。立不倚衡。遂均鴻毛之歿。傷足居憂。忘貽髮膚之痛。豈所以臨河永歎。含育最靈者也。伏惟陛下。施博天地。澤深禹湯。溫舒之策。優游虛授。衛展之議。寔失弗經。削秋荼之法。解凝脂之網。

爲卞彬謝修卞忠貞墓啓

臣彬啓伏見詔書并鄭義泰宣勅當賜修理臣
亡高祖晉故驃騎大將軍建興忠貞公壺墳塋
臣門緒不昌天道所昧忠構身危孝積家禍名
教同悲隱淪惆悵而年世貿遷孤裔淪塞遂使
碑表蕪滅邱樹荒毀狐兔成穴童牧哀歌感慨
自哀日月纏迫陛下弘宣教義非求效於方今
壺餘烈不泯固陳力於異世但加等之渥近闕
於晉典樵蘇之刑遠流於皇代臣亦何人敢謝
斯幸不任悲荷之至謹奉啓以聞謹啓

牋

到大司馬記室牋

記室參軍事任昉死罪死臯伏承以今月令辰
肅膺典冊德顯功高光副四海含生之倫庇身
有地况昉受教君子將二十年咳唾爲恩眄睵
成飾小人懷惠顧知死所昔承嘉宴屬有緒言
提挈之旨形乎善謔豈謂多幸斯言不渝雖情
謬先覺而迹淪驕餌湯沐具而非弔大厦構而
相賀明公道冠二儀勲超邃古將使伊周奉轡

桓文扶轂，神功無紀。作物何稱，府朝初建。俊賢
翹首，維此魚目。唐突璠璣，顧已循涯。寔知塵忝，
千載一逢。再造難答，雖則隕越。且知非報，不勝
荷戴。屏營之至，謹詣廳奉白牋謝聞。昉死罪死
旱

梁國府僚勸進牋

伏承嘉命，顯至仁策。明公逡巡盛禮，斯實謙尊
之旨。未窮遠大之致。何者，嗣君棄常，自絕宗社。
國命民生，翦爲仇讐。折棟崩榱，壓焉自及。卿士

懷脯斲之痛。黔首懼比屋之誅。明公亮格天之
功。拯水火之切。再躔日月。重綴參辰。反龜玉於
塗。泥濟斯民。於阬呀使夫匹婦童叟。羞言伊呂。
鄉校里塾。恥談五霸。而位卑乎阿衡。地狹於曲
阜。慶賞之道。尚其未洽。夫大寶公器。非要非距。
至公至平。當仁誰讓。明公宜祗奉天人。允膺大
禮。無使後予之歌。同彼胥怨。兼濟之仁。翻爲獨
善。

府僚重請牋

近以朝命蘊策，冒奏丹誠，奉被還命，未蒙虛受。搢紳顛顛，深所未達，蓋聞受金於府，通人之弘致，高蹈海隅，匹夫之小節，是以履乘石而周公不以爲疑，贈玉璜而太公不以爲讓，况世哲繼軌，先德在民，經綸草昧，歎深微管，加以朱方之役，荆河是依，班師振旅，大造王室，雖復累繭救宋，重脰存楚，居今觀古，曾何足云，而惑甚盜鐘，功疑不賞，皇天后土，不勝其酷，是以玉馬駿奔，表微子之去，金版出地，告龍逢之怨，明公據鞍

輟哭。厲三軍之志。獨居掩涕。激義士之心。故能使海若登祗。罄圖効祉。山戎孤竹。東馬景從。伐罪弔民。匡時靜亂。匪叨天功。實勤濡足。且明公本自諸生。取樂名教。道風素論。坐振雅俗。不習孫吳。邁茲神武。驅盡誅之民。濟必封之俗。龜玉不毀。誰之功與。獨爲君子。將使伊周何地。某等不達通變。實有愚誠。不任慳欸。棘心重謁。伏願特膺典策。式副民望。

任中丞集

卷全

四

書

爲庾杲之與劉居士蚪書

自別荆南。迄將二紀。杲之牽滯形有。推遷物役。丈人沒志外身。超然獨善。雖心懸咫尺。而事阻山河。悠悠白雲。依然有道。金涼伫運。想恒納宜。冲明在襟。履候無爽。體道爲用。蹈理則和。杲之牽綴疲朽。愧心已多。訪德則山林宵然。觀道則風雲自遠。歲暮之期。指塗衡岳。神虛氣懋。無待怡和。江湖相望。安事行李。司徒竟陵王懋於神

者言象所絕。接乎事者。遐邇所宗。鍾石非禮樂之本。纓褐豈朝塗之謂。想闇投之懷。不以形骸爲阻。一日通籍梁邱。親奉話言。夢想清塵。爲歲已積。以丈人非羔鴈所榮。故息蒲帛之典。勝寄冥通。諒有風期之遲。君王卜居郊郭。縈帶川阜。顯不徇功。晦不標迹。從容乎人野之間。以窮二者之致。且弘護爲心。廣孚真俗。思聞繫表。共剖衆妙。比日式筵山阿。虛館川渙。實望賁然。少訓側遲。昔東平樂善。旌君大於東閣。今王愛素。致

吾子於西山。豈不盛歟。百齡飄驟。凝滯自物。于
載一期。爲仁由已。且零雪戒塗。非滅迹之郊。鴻
鐘在御。豈銷聲之道。已標異人之迹。故有同物
之勞。夫山水無情。應之以會。愛閒在我。觸目蕭
條。衡岳何親。鍾嶺何薄。想弘思有在。不俟繁言。
答何肩書

得書知便。遠追疎董。超然高蹈。雖朝旨殷勤。而
輕棹已遠。供餞莫申。瞻言增慨。善保嘉猷。比致
音息。懷人望古。潛悵久之。

與江革書

建安王為雍州刺史革為記室參軍與弟觀少長共居苦求同行乃以觀行參軍兼記室時沈約任叅並相賞重叅與革書

此段雍府妙選英才文房之職總卿昆季可謂馭二龍於長途騁騏驎於千里

與沈約書

范僕射遂不救疾范侯涓孝睦友在家必聞直道正色立朝斯著一金之俸必徧親倫鍾庾之秩散之故舊佐命與王心力俱盡謀猷忠允諒

誠匪躬。破產而字死友之孤。開門而延故人之
殯。則惟其常無得而稱矣。器用車馬。無改平生
之素。憑論款對。不易布素之交。若斯人者。豈云
易遇。昉將蒞此邦。務在遄邁。雖解駕流連。再貽
款顧。將乖之際。不忍告別。無益離悲。祇增今恨。
永念平生。忽焉疇曩。追尋笑緒。皆成悲端。

弔樂永世書

永世孝友之至。發自天真。皎潔之操。曾非矯飾。
意有所固。白乃不移。理有所托。淄澠自辨。餘息

雖存視陰無幾終始之托方寄祁侯豈謂樂生
反先朝露以理遣滯鄙識未曉以事尋悲哀楚
交至松檟可拱悲緒無窮

策文

天監三年策秀才文三首

問秀才、朕長驅樊鄧、直措商郊、因藉時來、乘此
厯運、當辰永念、猶懷慙德、何者百王之敝、齊季
斯甚、衣冠禮樂、掃地無餘、斲雕剗方、經綸草昧、
採三王之禮、冠履粗分、因六代之樂、宮判始辨、
而百度草創、倉廩未實、若終畝不稅、則國用靡
資、百姓不足、則惻隱深慮、每時入芻稟、歲課田
租、愀然疚懷、如憐赤子、今欲使朕無滿堂之念、

民有家給之饒漸登九年之蓄稍去關市之征
子大夫當此三道利用賓王斯理何從仁聞良
說

問朕本自諸生弱齡有志閉戶自精開卷獨得
九流七略頗嘗觀覽六藝百家庶非牆面雖一
日萬幾早朝晏罷聽覽之暇三餘靡失上之化
下草偃風從惟此虛寡弗能動俗昔紫衣賤服
猶化齊風長纓鄙好且變鄒俗雖德慙往賢業
優前事且夫搢紳道行祿利然也朕傾心駿骨

非思真龍輜駟青紫如拾地芥而惰游廢業十
室而九鳴鳥蔑聞子衿不作弘獎之路斯旣然
矣猶其寂寞應有良規

問朕立諫鼓設謗木於茲三年矣比雖輻湊闕
下多非政要日伏青蒲罕能切直將齊季多諱
風流遂往將謂朕空然慕古虛受弗弘然自君
臨萬寓介在民上何嘗以一言失旨轉徙朔方
睚眦有違論輸左校而使直臣杜口忠讜路絕
將恐弘長之道別有未周悉意以陳極言無隱

任中丞集

卷全

畢

序

王文憲集序

公諱儉字仲寶琅邪臨沂人也其先自秦至宋國史家謀詳焉晉中興以來六世名德爲海內冠冕古語云仁人之利天道運行故呂虔歸其佩刀郭璞誓以淮水若離翦之止殺吉駿之誠感蓋有助焉公之生也誕受命世體三才之茂典踐得二之庶幾信乃昴宿垂芒德精降祉有一於此蔚爲帝師况乃淵角殊祥山庭異表望

衢罕窺其術。觀海莫際其瀾。宏覽載籍。博遊才
義。若乃金版玉匱之書。海上名山之旨。沉鬱澹
雅之思。離堅合異之談。莫不總制清衷。逶爲心
極。斯固通人之所包。非虛明之絕境。不可窮者。
其惟神用者乎。然檢鏡所歸。人倫以表。雲屋天
構。匠者何工。自函洛不守。憲章中輟。賀生達禮
之宗。蔡公儒林之亞。闕典未補。大備茲日。至若
齒危髮秀之老。含經味道之生。莫不北面人宗。
自同資敬。性託夷遠。少屏塵雜。自非可以弘獎

風流增益標勝，未嘗留心也。期歲而孤，叔父司空簡穆公，早所器異，年始志學，家門禮訓，折衷於公。孝友之性，豈伊橋梓，夷雅之體，無待韋弦。汝郁之幼，挺淳至。黃琬之早，標聰察。曾何足尚。年六歲，襲封豫宣侯，拜日，家人以公尚幼，弗之先告。既襲，絰組對揚王命，因便感咽，若不自勝。初，宋明帝居藩，與公母武康公主素不協。及卽位，有詔毀廢舊塋，投棄棺柩。公以死固請，誓不遵奉，表啓酸切，義感人神。太宗聞而悲之，遂無

以奪也。初拜秘書郎，遷太子舍人，以選尚公主，
拜駙馬都尉。元徽初，遷秘書丞，於是采公曾之
中經，刊弘度之四部。依劉歆七略，更撰七志。蓋
嘗賦詩云：稷契匡虞夏，伊呂翼商周。自是始有
應務之迹。生民屬心矣。時司徒袁粲有高世之
度，脫落塵俗，見公弱齡，便望風推服。歎曰：衣冠
禮樂，盡在是矣。時粲位亞台司，公年始弱冠，年
勢不侔，公與之抗禮。因贈粲詩，要以歲暮之期。
申以止足之戒。粲答詩云：老夫亦何寄，之子照

清襟服闋，拜司徒右長史，出爲義興太守，風化之美，奏課爲最。還除給事黃門侍郎，旬日遷尚書吏部郎，參選昔毛玠之清公，李重之識會，兼之者公也。俄遷侍中，以愍侯始終之職，固辭不拜，補太尉右長史。時聖武定業，肇基王命，寤寐風雲，實資人傑，是以宸居膺列宿之表，圖緯著王佐之符。俄遷左長史，齊臺旣建，以公爲尚書右僕射，領吏部。時年二十八。宋末艱虞，百王澆季，禮紊舊宗，樂傾恒軌。自朝章國紀，典彝備物。

奏議符策。文辭表記。素意所不蓄。前古所未行。皆取定俄頃。神無滯用。太祖受命。以佐命之功。封南昌縣開國公。食邑二千戶。建元二年。遷尚書左僕射。領選如故。自營郤分司。盧欽兼掌。譽望所歸。允集茲日。尋表解選。詔加侍中。又授太子詹事。侍中僕射如故。固辭侍中。改授散騎常侍。餘如故。太祖崩。遺詔以公爲侍中尚書令。鎮國將軍。永明元年。進號衛將軍。二年。以本官領丹陽尹。六輔殊風。五方異俗。公不謀聲訓。而楚

夏移情。故能使解劔拜仇。歸田息訟。前郡尹溫
太真。劉真長。或功銘鼎彝。或德標素尚。臭味風
雲。千載無爽。親加弔祭。表薦孤遺。遠協神期。用
彰世祀。時簡穆公薨。以撫養之恩。特深恒慕。表
求解職。有詔不許。國學初興。華夷慕義。經師人
表。允茲望實。復以本官領國子祭酒。三年。解丹
陽尹。領太子少傅。餘悉如故。挂服捐駒。前良取
則。臥轍棄子。後予胥怨。皇太子不矜天姿。俯同
人範。師友之義。穆若金蘭。又領本州大中正。領

之解職四年以本號開府儀同三司餘悉如故
謙光愈遠大典未申六年又申前命七年固辭
選任帝所重違詔加中書監猶參掌選事長輿
追專車之恨公曾甘鳳池之失夫奔競之途有
自來矣以難知之性協易失之情必使無訟事
深弘誘公提衡惟允一紀於茲拔竒取異興微
繼絕望側階而容賢候景風而式典春秋三十
有八七年五月三日薨於建康官舍皇朝軫慟
儲鉉傷情有識銜悲行路掩泣豈直春者不相

工女寢機而已哉。故痛深衣冠悲纏教義。豈非
功深砥礪。道邁舟航。沒世遺愛。古之益友。追贈
太尉侍中中書監如故。給節加羽葆鼓吹。增班
劔六十人。謚曰文憲禮也。公在物斯厚。居身以
約。玩好絕於耳目。布素表於造次。室無姬姜。門
多長者。立言必雅。未嘗顯其所長。持論從容。未
嘗言人所短。弘長風流。許與氣類。雖單門後進
必加吾誘。勗以丹青之價。弘以青冥之期。公銓
品人倫。各盡其用。居厚者不矜其多。處薄者不

怨其少窮涯而反盈量。知歸皇朝以治定制。禮
功成作樂。思我民譽。緝熙帝圖。雖張曹爭論於
漢朝。荀摯競爽於晉世。無以仰模淵旨。取則後
昆。每荒服請罪。遠夷慕義。宣威授旨。實寄弘略
理。積則神無忤。往事感則悅。情斯來。無是已之
心。事隔於容諂。罕愛憎之情。理絕於毀譽。造理
常。若可干。臨事每不可奪。約已不以廉物。弘量
不以容非。攻乎異端。歸之正義。公生自華宗。世
務簡隔。至于軍國遠圖。刑政大典。旣道在廊廟。

則理擅民宗。若乃明煉庶務。鑒達治體。懸然天
得。不謀成心。求之載籍。翰牘所未紀。訊之遺老
耳目所不接。至若文案自環。主者百數。皆深文
爲吏。積習成奸。畜筆削之刑。懷輕重之意。公乘
理照物。動必研幾。當時嗟服。若有神道。豈非希
世之儁民。瑚璉之宏器。昉行無異操。才無異能
得奉名節。迄將一紀。一言之譽。東陵侔於西山。
一盼之榮。鄭璞踰於周寶。士感知已。懷此何極。
出入禮闈。朝夕舊館。瞻棟宇而興慕。撫身名而

悼恩公自幼及長述作不倦固以理窮言行事該軍國豈直雕章縟采而已哉若乃統體必善綴賞無地雖楚趙群才漢魏衆作曾何足云昉嘗以筆札見知思以薄技効德是用綴緝遺文永貽世範爲如干帙如干卷所撰古今集記今書七志爲一家言不列于集集錄如左

文章緣起序

六經素有歌詩書誅箴銘之類尚書帝庸作歌毛詩三百篇左傳叔向貽子產書魯哀公孔子

誄。孔惺鼎銘。虞人箴。此等自秦漢以來。聖君賢士。泐著爲文章名之始。故因暇錄之。凡八十四題。抑以新好事者之目云爾。

議

齊明帝謚議

以爲窮神之迹、無繼於成名、教思所宗、言歸於有稱、是以則天爲大義、盡於翼善、武功受命、理貫於斯文、伏惟功高五讓、道冠三極、愛敬始於揚名、孝饗終乎嚴配、寥廓大度、誕君人之符、閨庭小節、應軌物之訓、厯試允諧、納揆時序、貽厥之寄、義均負圖、榱棟惟新、壓焉將及、於是承制宣德、定策公卿、登嗣后於西鍾、反獨夫於侯服、

既而主幼時艱，仍離屯蹇，應當璧之祥，注息肩之願，立德以長，紹開中興，擬度天行，取則乾健。日昃罷朝，幽枉必達，官曹寂寞，囿狃空虛，虎門肆義，犬足協律，巖廊有縉紳之談，鄉塾無橫議之士。既富而教，弘此孝治，遂使家無蕩子，埜有栖畝，置天下於掌握，覽八荒於戶牖，寵微金穴之家，恩絕椒風之館。天應民和，祥符惣暨，故能上變雲物，下漏深泉，若乃清邱丹陵之國，黃銀紫玉之瑞，幽符遠華，詢德報功，方將馳道日觀。

清宮鳴澤爲而不恃高揖成功百川所以朝宗
參辰於焉取正豈所謂中衢均奠懸衡共軌者
歟

何中文集

卷全

五

哀策文

王貴嬪哀策文

游衣戒節、羈車命服、永去椒華、長辭嘉福、笥緘
遺組、筵委塵鞠、將命啓期、實惟嘉數、珮空響其
何節、姆下堂、其誰傳、殯宮既毀、祖饋斯撤、爰命
史臣、宣美來裔、坤載既厚、內德云助、軒五有弘
姬十斯豫、誕茲邦淑、選自良家、爰登六列、象服
委虵、青絢丹纒、辰衣素紗、肅雍婦職、僉曰俞佳
贊景望舒、方娠明兩、心前軌慶、軒中增朗、與括

不愆、肫魄無爽、式陪璽觀、有事蠶宮、降輿訪道、
基我王風、宣禮撤豆、緝樂房中、居貴能降、在盈
思冲、仁者必壽、彼蒼者窮、如何不淑、萬化齊終、
薦車告途、殯窆旣辨、黼翬瓘以陸離、帷幌紛其
舒卷、出桂宮而北行、經未央以西、轉池、紉顧而
徐前、服馬嘶而不踐、霜霏微而初被、埜空籠而
始雕、促虞泉於薤露、撫悲翁於短簫、母以子貴、
義弘前哲、申襄齊削、以從疑革、麻縗之輕殺、達
副君之天至、賦白華之無缺、庶清廟之微微、非

壽原之未翳

碑

丞相長沙宣武王碑

玉映藍田、金鉉之望已集、木秀鄧林、輪轅之用
先表、值戎寇貪憚、羈縻失道、憑陵雉堞、逼迫濠
涅、都護之威既弛、副尉之策已謝、斧松晨析、易
子朝餐、乞師援絕、飛書路阻、公內定不戰之奇
外騁必勝之略、神功倏忽、有同拾遺、南下牧馬
旣寢折膠之術、北遯燕然、將空漠南之地、加以
廣平簡惠、信賞必罰、增貲就賦、夷歌成章、

桓宣城碑

君器量高濬、神氣披朗、商略雅俗、隱括真僞、擢
竒取異、不軌常流、固以準的當時、擬議郭許矣、
處身立朝、不峻功名、俯仰顯默之際、優游可否
之間、述卑而道不汙、身屈而志不屑矣、銘曰
於穆我后、稟茲純爽、虛豁高暢、蕭條邁上、風任
外舒、卓鑒內朗、神棲冲慎、形同俯仰、將登槐棘、
宏振綱網、令儀早徂、德音永響、

墓銘

撫軍桂陽王墓銘

於昭帝緒、擅美前王、綠圖丹紀、金簡玉筐、世載
台鼎、地居魯衛、沛易前傳、楚詩將說、桐圭誰戲、
甘棠何憇、

劉先生夫人墓銘

既稱萊婦、亦曰鴻妻、復有令德、一與之齊、實佐
君子、簪蒿杖藜、欣欣負戴、在冀之畦、居室有行
亟聞義讓、稟訓丹陽、弘風丞相、藉甚二門、風流

何中文集 卷之三
遠尚肇允才淑、聞德斯諒、蕪沒鄭鄉、寂寥揚冢、
參差孔樹、毫末成拱、暫起荒塹、長扃幽隴、夫貴
妻尊、匪爵而重、

行狀

齊竟陵文宣王行狀

公道亞生知。照臨幾庶。孝始人倫。忠爲令德。公
實體之。非毀譽所至。天才博瞻。學綜該明。至若
曲臺之禮。九師之易。樂分龍趙。詩析齊韓。陳農
所未究。河間所未輯。有一於此。罔不兼綜者歟。
昔沛獻訪對於雲臺。東平齊聲於揚史。淮南取
貴於食時。陳思見稱於七步。方斯蔑如也。初沈
攸之跋扈上流。稱亂陝服。宋鎮西晉熙王南中

郎邵陵王並鎮益口、世祖毗贊兩藩、而任總而
伐、公時從在軍鎮西府、版壹朔將軍軍主南中
郎、版補行參軍、署法曹、于時景燭雲火、風馳羽
檄、謀出股肱、任切書記、遷左軍、邵陵王主簿、記
室參軍、旣允焚林之求、實兼儀形之寄、刀筆不
足宣功、風體所以弘益、除邵陵王友、又爲安南
邵陵王長史、東夏形勝、關河重複、選衆而舉、敦
悅斯在、除使持節都督會稽東陽臨海永嘉新
安五郡諸軍事、輔國將軍、會稽太守、太祖受命

廣樹藩屏、公以高昭武穆、惟戚惟賢、封聞喜縣
開國公、食邑千戶、又以奏課連最、進號冠軍將
軍、越人之巫覩正風而化俗、篁竹之酋感義讓
而失險、邪叟忘其西、昇龍邱狹其東、臯會武穆
皇后崩、公星言奔波、泣血千里、水漿不入於口
者、至自禹穴、逮衣裳外除、心哀內疚、禮屈於厭
降、事迫於權奪、而茹感肌膚、沉痛創距、故知鐘
鼓非樂、云之本縗、龕非隆殺之要、改授征虜將
軍、丹陽尹、良家八徙、戚里內屬、政非一軌、俗備

五方。公內樹寬明，外施簡惠。神臯載穆，轂下以清。武帝嗣位，進封竟陵郡王，食邑如千戶。復授使持節、都督南徐兗二州諸軍事，鎮北將軍。南徐州刺史，遷使持節、侍中都督南兗徐北兗青冀五州諸軍事，征北將軍。南兗州刺史，兗徐接壤，素漸河潤，未及下車，仁聲先洽，玉關靖柝。北門寢扃。朝旨以董司岳牧，敷與邦教，方任雖重，比此爲輕。徵護軍將軍，兼司徒、侍中如故。又授車騎將軍，兼司徒、侍中如故。卽授司徒、侍中。又

如故。上穆三能，下敷五典。闢玄闈以闡化，寢鳴鐘以體國。翼亮孝治，緝熙中教。奪金恥訟，蹊田自嘿。不雕其朴，用晦其明。聲化之有倫，繫公是賴。庠序肇興，儀形國胄。師氏之選，允歸人範。以本官領國子祭酒，固辭不拜。八座初啓，以公補尚書令。式是敷奏，百揆時序。夫國家之道，互爲公。私君親之義，迤爲隱犯。公二極一致，愛敬同歸。亮誠盡規，謀猷弘遠矣。又授使持節都督揚州諸軍事、揚州刺史。本官悉如故。舊惟淮海今

則神牧編戶殷阜氓俗滋繁不言之化若門到
戶說矣頃之解尚書令改授中書監餘悉如故
獻納樞機絲綸允緝武皇晏駕寄深負圖公仰
惟國典俛遵遺託俯擗天倫踊絕於地居處之
節復如居武穆之憂聖主嗣興地居旦奭有詔
策授太傅領司徒餘悉如故坐而論道動以觀
德地尊禮絕親賢莫貳又詔加公入朝不趨讚
拜不名劔履上殿蕭傅之賢曹馬之親兼之者
公也復以申威重道增崇德統進督南徐州諸

軍事餘悉如故。並表疏累上。身沒讓存。天不憖
遺。梁岳頽峻。某年某月日薨。春秋三十有五。詔
給溫明秘器。斂以衮章。備九命之禮。遣大鴻臚
監護喪事。朝夕奠祭。大官供給。禮也。故以慟極
津門。感克長樂。豈徒春人。不相傾壘。罷肆而已
哉。乃下詔曰。褒崇庸德。前王之令典。追遠尊戚。
公情之所隆。故使持節都督揚州諸軍事。中書
監太傅領司徒揚州刺史。竟陵王新除進督南
徐州。體睿履正。神監淵邈。道冠民宗。具瞻惟允。

肇自弱齡，孝友光備。爰及贊契，協升景業。燮和
台曜，五教克宣。敷奏朝端，百揆惟穆。寄重先顧，
任均負圖。諒以齊徽，二南同規。往哲方憑保佑，
永翼雍熙。天不憇遺，奄見薨落。哀慕抽割，震動
於厥心。今先遠戒期，龜謀襲吉。茂崇嘉制，式弘
風猷。可追崇假黃鉞侍中都督中外諸軍事太
宰領大將軍揚州牧綠綬綬具九錫服命之禮
使持節中書監王如故給九旒鑾輅黃屋左纛
輻涼車前後部羽葆鼓吹挽歌二部虎賁班劍

百人葬禮一依晉安平獻王孚故事公道識虛
遠表裏融通淵然萬頃直上千仞僕妾不覩其
喜愠近侍莫見其傾弛他人之善若已有之民
之不臧公實貽恥誘接恂恂降以顏色方於事
上好下規已而廉於殖財施人不倦帝子儲季
令行禁止國綱天憲寘諸掌握未嘗鞠人於輕
刑錮人於重議入有不及內恕諸已非意相干
每爲理屈任天下之重體生民之俊華袞與緼
緒同歸山藻與蓬茨俱逸良田廣宅符仲長之

言邗山洛水。協應叟之志。邱園東國。錙銖軒冕。乃依林構宇。傍巖拓架。清後與壺人爭旦。緹幙與素灑交輝。置之虛室。人埜何辨。高人何點。躡蹻于鍾阿。徵士劉蚪。獻書於衡岳。贈以古人之服。弘以度外之禮。屈以好士之風。申其趨王之意。乃知大春屈已於五王。君大降節於憲后。致之有由也。其卉木之奇。泉石之美。公所製山居。四時序言之已詳。文皇帝養德東朝。同符作者。爰造九言。實該百行。遵衿禱於未萌。申炯戒於

茲日、非值旦暮千載故、乃萬世一時也。命公誌
解衛將軍王儉、綴而序之。山宇初構、超然獨往。
顧而言曰：死者可歸，誰與入室？尚想前良，俾若
神對。乃命畫工圖之。軒牖既而緬屬英賢，仿思
才淑匹婦之操，亦有取焉。有客游梁朝者，從容
而進曰：未見好德，愚竊惑焉。卽命刊削，投杖不
暇。公以爲出言自口，驥驟不追，聽受一謬。差以
千里。所造箴銘，積成卷軸，門階戶席，寓物垂訓。
先是震於外寢，匠者以爲不祥，將加治葺。公曰：

此天譴也、無所改脩。以記吾過、且令戒愆、不怠、
從諫如順流、虛已若不足、至于言窮藥石、若味、
滋旨、信必由中、貌無外悅、貴而好禮、怡寄典墳、
雖牽以物役、孜孜無怠、乃撰四部要畧、淨住子、
並勒成一家、懸諸日月、弘洙泗之風、闡迦維之、
化、大漸彌留、話言盈耳、黜殯之請、至誠懇惻、豈、
古人所謂立言於世、沒而不朽者歟、易名之典、
請遵前烈、謹狀

齊司空曲江公行狀

公稟靈景宿擅氣中和一匱初登東嶽之功可
監堦埴在器瑚璉之姿先表豈惟荆南有聖童
之目襄城著孔甫之稱而已哉故以羽儀宗家
冠蓋後進路叔之一日千里北海之稱美共治
方斯茂如也志學之年徧治經記登隆十載網
羅百氏藻斲瞻逸蔚爲詞宗延賈誼而升堂携
相如而入室加以翰牘精辯發言有章持論從
容辭無矜尚自河洛邱墟厯載二百俾我逢掖
遂淪左袵晉宋所以遺恨宗祖是用顧懷公自

荷方任志在尅復將欲使功遂之日身退有所
爰乃卜居金陵營帶林壑用辭聊城之賞以爲
疏韓之館人謝運往遂輟遠圖

弔文

弔劉文範文

余與先生雖年世相接而荆吳數千未嘗膝行
下風稟承餘論豈直發憤當年固亦恨深終古
然叔夜之敘黔婁韓卓之慕巨伸未必接光塵
承風彩正復希向遠理長想千載然其人自高
假使橫經擁篲日夜掃門會不睹千仞之一咫
萬頃之涓澮終於對面萬古莫能及門故以此
弔千載之恨。

詩

爲王嫡子侍皇太子釋奠宴

以下四言

在昔歸運。阻亂弘多。夷山製宇。盪海爲家。風雲
改族。日月增華。欽聖茲遠。懷道茲冲。踐言動俗。
果行移風。進往一簣。啓或三蒙。冰實因水。金亦
在鎔。惟神知化。在物立言。樂正雅頌。咸被后昆。
告奠明祀。觀道聖門。日月不息。師表常尊。

贈王僧孺

王僧孺由治書侍御史出爲唐令。初僧孺與昉文學友會。及是將之縣。昉贈詩

惟子見知。惟余知子。觀行視言。要終猶始。敬之重之。如蘭如芷。形應影隨。曩行今止。百行之首。立人斯著。子之有之。誰毀誰譽。脩名旣立。老至何遽。誰其執鞭。吾爲子御。劉畧班藝。虞志荀錄。伊昔有懷。交相欣勗。下帷無倦。升高有屬。嘉爾晨燈。惜余夜燭。

答劉居士

君子之道。亦有其四。高行絕俗。盛德出類。才同文錦。學非書肆。望之可階。卽之難至。輟精天理。

躔象少微人與俗異道與人違庭飛熠燿室滿
伊威行無轍跡理絕心機

九日侍宴樂遊苑

以下
五言

帝德峻韶夏王功書頌平共貫汾五勝獨道邁
三英我皇撫歸運時乘信告成一唱華鍾石再
撫被絲笙黃草歸雒木梯山薦玉榮時來濁河
變瑞起溫洛清物色動宸眷民豫降皇情

奉和登景陽山

物色感神遊升高悵有闕南望銅馳街北走長

楸埽別澗宛滄溟，疏山駕瀛碣，奔鯨吐華浪，司
南動輕柅，日下重門照，雲開九華澈，觀閣隆舊
恩，奉圖愧前哲。

泛長溪

狗祿聚歸糧，依隱謝羈勒，絕物甘離羣，長懷思
去國，長溪永東舍，震區窮水域，道遇垂綸叟，聊
訪問津惑，弭楫申九言，無爲累牽纏，長泛滄浪
水平明至曛黑。

落日泛舟東溪

黝黝桑柘繁、芄芄麻麥盛、交柯溪易陰、反景澄、
餘映吾生雖有待、樂天度知命、不學梁甫吟、惟
識滄浪詠、田荒我有役、秩滿余謝病、

濟浙江

昧旦乘輕風、江湖忽來往、或與歸波送、乍逐翻
流上、近岸無暇目、遠峰更興想、綠樹懸宿根、丹
崖頽以壤、

贈郭桐廬出谿口見候余旣未至郭仍進
村維舟以之郭生方至

朝發富春渚。蓄意忍相思。涿令行春返。冠蓋溢
 川坻。望火方來萃。悲懽不自持。滄江路窮此。湍
 險方自茲。疊嶂易成響。重以夜猿悲。客心幸自
 弭。中道遇心期。親好自斯絕。孤遊從此辭。

答何徵君

散誕羈鞅

一作勒

外拘束名教裏得性千乘同山

林亦朝市勿以耕蠶貴空笑易農士宿昔仰高
 山超然絕塵軌傾壺已等樂命管亦齊喜無爲

嘆獨遊若終

一作路

方同止

贈徐徵君

外編作吳均者非

促生悲永路。早交傷晚別。自我隔容徽。於焉徂
歲月。情非山河阻。意似江湖悅。東臯有儒素。杳
與榮名絕。曾是違賞心。曷用箴余缺。眇焉追平
生。塵書廢不閱。信此伊能已。懷抱豈暫輟。何以
表相思。貞松擅嚴節。

答劉孝綽

孝綽繪之子。年十四。父黨沈約任昉等
聞其名。命駕造焉。昉尤相賞愛。天監初
孝綽起家著作佐郎。爲
歸沐詩贈昉。昉報曰

閱水既成瀾、藏舟遂移壑、彼美洛陽子、投我懷
秋作、久敬類、誠言吹噓似、嘲謔兼、稱夏雲盡、復
陳秋樹索、詎慰耄嗟人、徒深老夫託、一作徒然
老夫諾
直史兼褒貶、轄司專疾惡、九折多美疹、匪報庶
良藥、子其崇鋒穎、春耕勵秋穫、

答到建安餉杖

故人有所贈、稱以冒霜筠、定是湘妃淚、潛灑遂
璘彬、扶危復防咽、事歸薄暮人、勞君尚齒意、矜
此杖鄉辰、復資後坐、一作彦候余方欠伸、獻君

千里笑紆我百憂。嘖坐適雖有噐。臥遊苦無津。何由乘此竹直見平生親。

寄到漑

到漑爲建安太守
昉寄詩求二彩段

鐵錢兩當一百易代名實爲惠當及時。無待涼
秋日。

別蕭諮議

離燭有窮輝。別念無終緒。岐言未及申。離目已
先舉。揆景巫衡阿。臨風長楸浦。浮雲難嗣音。徘徊

任中丞集
卷之八
三
徇悵誰與儻、有關外驛、聊訪狎鷗渚、

厲吏人講學

暮燭迫西榆、將落誠南畝、曰余本疎慵、頽暮積
榆柳、踐境渴師臣、臨政欽益友、盱食願橫經、終
朝思擁帚、雖欣辨蘭艾、何用闢蒿莠

苦熱

旭旦烟雲卷、烈景入東軒、傾光望轉蕙、斜日照
西垣、旣卷蕉梧葉、復傾葵藿根、重簾無冷氣、挾
石似懷溫、霰霜類珠綴、喘嚇狀雷奔、

同謝朓花雪

土膏候年動，積雪表晨暮。散葩似浮玉，飛英若
總素。東序皆白珩，西籬盡翔鷺。山經陋密榮，騷
人貶瓊樹。

出郡傳舍哭范僕射三首

平生禮數絕，式瞻在國楨。一朝萬化盡，猶我故
人情。待時屬興運，王佐俟民英。結懽三十載，生
死一交情。携手遁衰孽，接景事休明。運阻衡言
革，時泰玉階平。濬冲得茂彥，夫子值狂生。伊人

有涇渭、非余揚濁清、將乖不忍別、欲以遣離情、
不忍一辰意、千齡萬恨生、

已矣平生事、詠歌盈篋筥、兼復相嘲謔、常與虛、
舟、值何時見范侯、還叙平生意、

與子別幾辰、經塗不盈旬、弗覩朱顏改、徒想平、
生人、寔知安歌日、非君撒瑟辰、已矣余何歎、輟、
春哀國均、

巖陵瀨

羣峰此峻極、參差百重嶂、清淺旣漣漪、激石復

奔壯、神物徒有造、終然莫能狀。

詠池邊桃

已謝西王苑、復揖綏山枝、聊逢賞者愛、棲趾傍
蓮池、開紅春灼灼、結實夏離離、

Handwritten text on the right margin, including the characters '三十一' (31) and '三十二' (32).

聯句

清暑殿聯句栢梁體

居中負辰寄纓紱

帝梁武帝

言慙輻輳政無術

新太守

任昉

至德無垠愧違弼

侍中徐勉

燮贊京河豈微物

丹陽

丞劉洗

竊侍兩宮慙樞密

黃門侍郎柳澄

清通簡要臣豈

汨

吏部郎中謝覽

出入帷辰濫榮秩

侍中張卷

複道龍樓歌

楸實

太子中庶子王峻

空班獨坐慙羊質

御史中丞陸杲

嗣以

書記臣敢匹

有軍主簿陸倕

謬參和鼎講畫一

司徒主簿劉治

鼎味參和臣多匱

司徒左西屬江曹

本
三
木
公
三

本傳

任昉字彥升樂安博昌人也父遙齊中散大夫
遙兄遐字景遠少啟學業家行甚謹位御史中
丞金紫光祿大夫始興永明中遐以罪將徒荒
裔遙懷名請訴言淚交下齊武帝聞而哀之竟
得免遙妻河東裴氏高明有德行嘗晝臥夢有
五色采旗蓋四角懸鈴自天而墜其一鈴落入
懷中心悸因而有娠占者曰必生才子及生昉
身長七尺五寸幼而聰敏早稱神悟四歲誦詩

數十篇。八歲能屬文。自製月儀。辭義甚美。褚彥
回嘗謂遙曰。聞卿有令子。相爲喜之。所謂百不
爲多。一不爲少。由是聞聲籍甚。年十二。從叔晷
有知人之量。見而稱其小名曰。阿堆。吾家千里
駒也。昉孝友純至。每侍親疾。衣不解帶。言與淚
并。湯藥飲食。必先經口。初爲奉朝請。舉兗州秀
才。拜太學博士。永明初。衛將軍王儉領丹陽尹。
復引爲主簿。儉每見其文。必三復殷勤。以爲當
時無輩。曰。自傳季友以來。始復見於任子。若孔

門是用。其入室升堂。於是令昉作文。及見曰。正得吾腹中之欲。乃出自作文。令昉點正。昉因定數字。儉拊几歎曰。後世誰知子定吾文。其見知如此。後爲司徒。竟陵王記室參軍。時琅琊王融有才儻。自謂無對。當時見昉之文。愧然自失。以父喪去官。泣血三年。杖而後起。齊武帝謂昉伯遐曰。聞昉哀瘠過禮。使人憂之。非直亡卿之寶。亦時才可惜。宜深相全譬。遐使進飲食。當時勉勵。回卽嘔出。昉父遙本性重檳榔。以爲常餌。

臨終嘗求之剖百許口不得好者昉亦所嗜好深以爲恨遂終身不嘗檳榔。遭繼母憂昉先以毀瘠每一慟絕良久乃蘇。因廬於墓側以終喪禮。哭泣之地草爲不生。昉素疆壯腰帶甚克服。闋後不可復識。齊明帝深加器異欲大相擢引。爲愛憎所白乃除太子步兵校尉掌東宮書記。齊明帝廢鬱林王始爲侍中中書監驃騎大將軍開府儀同三司揚州刺史錄尙書事封宣城郡公使昉具草帝惡其辭斥甚愠昉亦由是終

建武中位不過列校。昉尤長爲筆頗慕傅亮才
思無窮。當時王公表奏無不請焉。昉起草卽成
不加點竄。沈約一代辭宗深所推挹。永元中紆
意於梅虫兒。東昏中旨用爲中書令。謝尙書令
王亮亮曰。卿宜謝梅。那忽謝我。昉慙而退。末爲
司徒右長史。梁武帝尅建鄴。霸府初開以爲驃
騎記室參軍。專主文翰。每制書草。沈約輒求同
署。嘗被急召。昉出而約在。是後文筆。約參製焉。
始梁武與昉遇竟陵王西邸。從容謂昉曰。我登

三府當以卿爲記室。昉亦戲帝曰：我若登三事，當以卿爲騎兵。以帝善騎也。至是引昉符昔言焉。昉奉牋云：昔承清宴，屬有緒言。提挈之旨，形乎善謔。豈謂多幸，斯言不渝。蓋謂此也。梁臺建禪讓文誥，多昉所具。奉世叔父母，不異嚴親。事兄嫂恭謹。外氏貧闕，恒營奉供養。祿奉所收四方餉遺，皆頒之親戚。卽日便盡。性通脫，不事儀形。喜愠未嘗形於色。車服亦不鮮明。武帝踐祚，歷給事黃門侍郎、吏部郎，出爲義興太守。歲荒

民散以私奉米豆爲粥。活三千餘人。時產子者不舉。昉嚴其制。罪同殺人。孕者供其資費。濟者千室。在郡所得公田奉秩八百餘石。昉五分督一。餘者悉原。兒妾食麥而已。友人彭城到漑漑弟洽從昉共爲山澤游。及被代登舟。止有絹七匹。米五石。至都無衣。鎮軍將軍沈約遣裙衫迎之。重除吏部郎。參掌大選。居職不稱。尋轉御史中丞。秘書監。自齊永元以來。祕閣四部。篇卷紛雜。昉手自讎校。由是第目定焉。出爲新安太守。

在郡不事邊幅。率然曳杖。徒行邑郭。人通辭訟者。就路決焉。爲政清省。吏人便之。卒於官。唯有桃花米二十石。無以爲歛。遺言不許以新安一物。還都。雜木爲棺。浣衣爲歛。闔境痛惜。百姓共立祠堂於城南。歲時祠之。武帝聞問。方食西苑綠沉瓜。投之於盤。悲不自勝。因屈指曰。昉少時常恐不滿五十。今四十九。可謂知命。卽日舉哀。哭之甚慟。追贈太常。諡曰敬子。昉好交結。獎進士友。不附之者。亦不稱述。得其延譽者。多見升。

擢故衣冠貴游莫不多與交好坐上客恒有數十時人慕之號曰任君言如漢之三君也在郡尤以清潔著名百姓年八十以上者遣戶曹掾訪其寒溫嘗欲營佛齋調楓香二石始八三斗便出教長斷曰與奪自己不欲貽之後人郡有密嶺及楊梅舊爲太守所采昉以冒險多物故卽時停絕吏人咸以百餘年未之有也爲家誠殷勤甚有條貫陳郡殷芸與建安太守到漑書曰哲人云亡儀表長謝元龜何寄指南何托其

爲士友所推如此。昉不事生產，至乃居無室宅，時或譏其多乞貸，亦隨復散之。親故常自歎曰：知我者亦以叔則，不知我者亦以叔則。旣以文才見知，時人云：任筆沈詩，昉聞甚以爲病。晚節轉好著詩，欲以傾沈用事過多，屬辭不得流便。自爾都下士子慕之，轉爲穿鑿。於是，有才盡之談矣。博學於書，無所不見。家雖貧，聚書至萬餘卷，率多異本。及卒後，武帝使學士賀縱共沈約，勘其書目。官無者，就其家取之。所著文章數十

萬言盛行於時東海王僧孺嘗論之以爲過於
董生揚子昉樂人之樂憂人之憂虛徃實歸忘
貧去吝行可以厲風俗義可以厚人倫能使貧
夫不取懦夫有立其見重如此有子東里西華
南容北叟並無術業墜其家聲兄弟流離不能
自振生平舊交莫有收卹西華冬月著葛屨練
裙道逢平原劉孝標泣然矜之謂曰我當爲卿
作計乃著廣絕交論以譏其舊友到漑見其論
抵几於地終身恨之昉撰雜傳二百四十七卷

地記二百五十二卷，文章三十三卷，東里位尚
書外兵郎

任中丞集終